

REGIONAL NEWS BULLETIN

(MIDDAY)

Wednesday, March 4, 2026

Time - 2:30pm - 2:35pm



CESS

Mizoram sorkarin Petrol leh Diesel atanga Road Infrastructure Cess a lak atanga sum hmuh zat chu nikum December thla thleng khan a vaiin cheng vaibelchhe 46, nuai 68, sing 7 sang 2 leh 326 a tling tawh.

MNF member Pu Lalchhandama Ralte zawhna Finance changtu Chief Minister Pu Lalduhoma'n ziak a a chhan danin 2024-25 tangka kum chhung (October 2024 leh March 2025 inkar) a Road Infrastructure Cess atanga sum hmuh zat chu cheng vaibelchhe 13, nuai 25, sing 1, sang 2 leh 578 a ni a. Kum 2025-26 tangka kum (April 2025 leh December 2025) chhunga hmuh tawh zat chu cheng vaibelchhe 33, nuai 43, sing 5, sang 9 leh 748 a ni. Pu Lalduhoma chuan Road Maintenance Cess atanga sum hmuh atang hian cheng vaibelchhe 15 chu 2025- 2026 tangka kum kal lai mekah hian Mizoram State Road Fund Board hnuaia kawng siam na'n dah a nih thu a sawi a. A hmanna kimchang hi chu Mizoram State Road Fund Board kut a nih avangin Finance Department-in record a nei lo a ni, a ti.

Mizoram sorkarin Petrol leh Diesel atang tho a Social Infrastructure and Services Cess a lak atanga sum hmuh zawng zawng chu nikum December thla thleng khan cheng vaibelchhe 46, nuai 68, sing 7 sang 2 leh 326 tho a ni a. He ta sum tling khawm hi department hrang hrang 5 hnenah sem chhuah a ni a. Health & Family Welfare department hnenah hriselna ruhrel tihchangtlunna atan cheng vaibelchhe 3 pek a ni a. Social Welfare department hnenah Hulhliap (short stay) senso atan cheng vaibelchhe 1 leh nuai 50 bakah vantlang hnathawhna atana pawimawh senso hrang hrang atan cheng nuai 75 pek a ni a. Women & Child Development hnenah cheng nuai 75 pek a nih bakah Higher & Technical Education department leh School Education department hnenah cheng vaibelchhe khat leh nuai 50 ve ve pek a ni bawk.



VP VISIT

Aizawl Municipal Corporation (AMC) chuan Inrinni hian Vice President Pu C.P. Radhakrishnan-a'n Mizoram University a tlawh dawn avangin Lok Bhavan hmar lam kawngkapui atanga Dak inpui inkar te hian kawng sira chawhmeh zuar thin te chawhma dar 11 hma lamah thut phal a nih loh thu thupek a chhuah a. Hemi ni hian Lok Bhavan atanga Mizoram University inkara kawngpui sirah thil zawrh lai leh mimal bungrua dah hnawk Io turin hriattirna a chhuah a, a paltlang Local Council te chu mahni veng chhung theuh lo en tel turin an chah bawk a ni.

Aizawl district SP chuan Vice President-in Lengpui tumhmun a lo thlen ni tur Zirtawpni zing dar 9 atanga tlai dar 5.30 inkar chhung hian Lengpui tumhmun leh Lok Bhavan inkar kawng veng hrang hrangah lirthei, bungrua leh thil dang dah a khap a. Inrinni-ah Lok Bhavan leh Mizoram University leh Lengpui tumhmun

inkarah zing dar 6 atanga tlai dar 2 inkarah lirthei, bungrua leh thildang engmah dah a khap baw k a. He lai kawngpui dunga lirthei leh bungrua dahte pawhin ,zana lo dahsawn lawk vek turin a hriattir baw k a. Vice President chet vel chhung bik hian darkar chanve chhung vel kawngpui dan chah a ni dawn a, lirtheia veivak ten harsatna an tawh loh nan lo inhmakhua lawk turin lirthei neitu leh khalhtute a hriattir baw k a ni.

He tih lai vek hian Mamit district magistrate Pi Carolyn L.B. Khiangte chuan Bharatiya Nagarik Suraksha Sanhita (BNSS), 2023 section 163 tlawhchhanin Vice President lo zin hun chhung - Ningani atanga Inrinni inkar chhung hian Mamit district khua - Rawpuichhip, Tuahzawl, Hmunpui, West Serzawl, Dapchhuah, Dilzawl, Nghalchawm leh Lengte khuate chu lo hal a khap a. Hei hi Lengpui Airport leh a chhehvela thil duhawmlo thleng thei laka invenna leh venhimna tha taka kalpui a nih thu tarlan a ni.



GOOD GOVERNANCE

DP&AR Minister Pu K. Sapdanga chuan Ministry of Personnel, Public Grievances & Pensions-in Good Governance Index a tih chhuah hnuhnung ber 2020-21 khan Mizoram chu hmarchhak leh tlangram state (North East & Hill State) 11-te zinga a ti tha ber pahnihnaa puan a ni, a ti.

MNF member Pu Lalchhandama Ralte zawhna ziaka chhangin Pu K. Sapdanga chuan sorkar inrelbawl na tha tehna (Good Governance Index)-ah hian sector hrang hrang a hmasaw nna leh sorkar hmalaknate hi tehfung atana hman a nih thu sawiin lo neih lam leh a behbawm, sumdaw nna leh thilsiam chhuah lam, zirna leh mi hmantlak chher chhuah, vantlang hriselna, mipui vantlang mamawh rotling siam, ei leh bar lam hmasaw nna, khawtlang nunphung hmasaw nna, court rorelna leh mipui himna, boruak, nungcha leh ramngaw humhalh bakah khua leh tuite tana sorkar inrelbawl na kalpui thate a nih thu a sawi.



GSDP-DEBT RATIO

Finance changtu Chief Minister Pu Lalduhoma chuan tun Assembly inkhawm kal lai mekah zawhna chhangin kum 2023 atanga kum 2025 thleng Mizoram sum thawhchhuah 'Gross State Domestic Product' (GSDP), atanga chhuta Mizoram leiba neih zat a sawi a. Kum 2023-24 tangka kumah khan Mizoram sum thawh chhuah (GSDP) cheng vaibelchhe 31,917 leh nuai 72 a nih laiin leiba chu cheng vaibelchhe 12,082 leh nuai 26 a ni a, sum thawh chhuah leh leiba inthlauhna hi za zela 37 point 85 a ni, a ti a. Kum 2024-25 tangka kum chhunga Mizoram sum thawhchhuah chu cheng vaibelchhe 36,030 leh nuai 66 a nih lai-in leiba cheng vaibelchhe 14,637 leh nuai 72 a awm a. Leiba neih zat hi thawhchhuah atanga chhutin za zela 40 point 63 a ni a ti.

